

尚

綱

堂

集

尙絅堂詩集卷十五

陽湖 劉嗣綰 醇甫

雪苑集 壬子

新正由武昌取道襄陽赴豫仍館商邱陳氏顧舊雨  
寥落孤燈坐對惟吳子枚菴相酬唱而已  
由鄂城取道襄陽赴宋中留別在楚諸子

朝吟雲夢雲暮賦雪苑雪笛聲吹落江上梅十里闌干正  
愁絕闌干面面江中央遊子欲去天悽惶仙人樓頭一掬  
淚古來離別三千場烟低水濶疑無岸楚語微聞隔篷喚  
留人檣燕尙徘徊送客城鴉已零亂客中作客魂易銷此  
身况逐烟塵飄一條江水綠如許明日便已迎春潮桃花

廟前各招手不見桃花見楊柳歸心空唱大江東細雨催  
愁入樊口宜城酒好熟幾時家家醉倒山公池殘盃冷  
此何客拍手笑煞襄陽兒伯勞東飛雁北去歷歷晴川隔  
烟樹人間無處無長風欲跨魚龍渺難渡黃河之水天上  
來懷抱抑塞何時開馬頭相望不相見鞭絲擲上梁王臺

晚思

畫裏江湖思渺然清尊歷歷記前緣長庚伴月來千里春  
水如天共一船醉墨滿襟題漢上茶烟半榻夢晴川笙囊  
笛薦蕭閑甚收拾風光與坐禪

江帆

空烟漠漠雨絲絲掛席來尋畫裏詩江上生綃新剪後渡

頭羽扇半開時因山向背原無定上水高低可自知破浪  
會須行萬里年年只恨好風遲

積雪初盡晚晴忽開悵然成詠

雪盡江更空落帆橫浦側孤亭夕照裏一雁見風色買酒  
歸路遙寒雪歛成夕渺渺埜水橫荒荒岸烟直沙禽背船  
飛見面不相識明月來未來前山豈能隔

晚霽天半開林巒若爲曉山邨固寥落復此人烟少清景  
行處佳離懷坐來悄招手上柁樓漁歌入杳渺高霞不成  
戀欲去委孤鳥極目幾歸舟寒鐘佇空表

漢江舟中雜詩

涉江愁水深涉漢愁水淺水色綠照人春光若爲顯近看

魚淦淦遠識鷗點點沙明岸初出灘暗路猶緬石骨如高  
人輒復露偃蹇豈無滄海與清濁兩難遣會當汲江流松  
風翻蟹眼

天際露初沐曉來看翠微推窗飲空綠便欲忘朝饑際此  
風日淡不見烟霧霏山光有衆妙調劑得所宜攬之不盈  
掬時復上我衣高吟孟公詩意與孤雲飛

遠笛起斜陽漁歌向空靡輕舟溯江上泱泱愁不已村鴉  
昏似墨畫手出顛米僧衣開水田豈辨表與裏蒼茫莫色  
來尺幅已千里望望暝烟深蜻蛉撲沙尾

江堤無別樹一綠皆垂楊春風吹幽禽自成宮與商前村  
見茅舍疑是輞口莊籬落散雞犬陂田下牛羊人家扉不

關一半分夕陽行行出樵逕散步不覺長詠歌適我情願  
茲慰壺觴

舟中望鹿門山

暮山蒼蒼橫翠微清江激激風吹衣鹿門人去幾千載輕  
帆如鳥山前飛前山後山烟雜背欲問龐公山四合月明  
鐘定悄無言中有灘聲自相答

大隄曲

大隄多女兒開門漢江側門前一樹桃春風可曾識  
大隄十里長是儂來往路路旁胡蝶飛得郎幾回顧  
郎從江上來勸郎勿回頭春江自無情朝朝逐風流  
門前曉鳥啼郎行忽東西妾心本車輪願隨郎馬蹄

江隄曉行

長隄萋綠怨王孫  
草草離歌送出門  
天上朝霞空有色  
人間殘月最銷魂  
飄零湖海餘吟骨  
冷落關河見酒痕  
灑與羊公數行淚  
峴山回首易雲昏

新店

鈴聲隱隱各西東  
酒未成醒向朔風  
門裏行人門外曉  
來都在亂山中

曉渡

愁緒不堪整曉風  
生亂絲相看遠天末  
獨立長河湄江上  
雁歸早汝南鷄唱遲  
蒼茫空喚渡霜月有餘悲

潁橋

鞭梢挂殘月曉色落清潁忽憶潁濱翁霜橋酒初醒

渡洧水

征途遶洧川暫此息塵鞅方春水未渙雨過亦漸長豈有  
舟梁通褰裳自堪往欲高濯足興忽動洗耳想臨流慎勿  
聽恐有桑濮響

曉發陳留驛

殘夢一十里醒來天已明初陽淡如月向我衣上生迢迢  
捐荒驛曲折無定程墟烟來樹梢始見去路橫縣古非舊  
圖村僻多異名隔林聽呼犢中有蓑笠行從之問前途超  
忽驟輿輕

野店一壺酒停車古樹邊荒郊掩寒色鷄犬方晏眠豈知



柴門外駐此遠道鞭征夫不識路空問陌與阡誰明去矣  
懷且息勞者肩寒鴉瘦似人依依立我前顧之忽飛去遙  
隔桑陰田

杞縣

婦姑城上望依舊杞人天古怨歌明月閒愁立暮煙怒鷹  
窺短草飢雀聚荒田忠節祠堂在傷心牧火邊

地有劉忠節公祠

寧陵道中

犬吠隔離聲人家夜火明疎星垂野屋缺月補山城遠夢  
郵塵亂荒煙土銼輕天涯隨意住明日當歸程

途中雜詩

一燈殘夢驛塵昏天未明時已出門行過斷橋愁馬滑曉

來滿地是霜痕

風沙黯淡沒征裘  
帽影囙囙出裕州  
多謝青山遠相送  
不辭一步一回頭

舊城南去是昆陽  
簫鼓叢祠十日忙  
未到門前先下馬  
一盂麥飯拜蕭王

墨池別薛訪高蹤  
破壁塵昏盡日封  
畢竟虛名誰好得  
世

間休笑葉公龍

葉縣城東有墨池相傳爲葉公畫龍處

短長亭下雨瀟瀟  
爲送征塵十里遙  
一路條枚都折盡  
行人空過汝墳橋

落日前山看紫雲  
靈衣玉劍徒紛紛  
清川如境照何許  
我來卻憶襄城君

櫻桃花底客思家破壁留詩幾歲華誰識郵亭風雪夜有

人移燭爲籠紗

襄城題壁詩憶着江南好風景  
櫻桃花底客思家清婉可誦

十里畚田九里橫烏犍獨立看人耕無端補出江南畫菱

角湖邊上晚晴

犢鼻生涯不諱窮前村猶說阮家風當年在自分南北總

在荒烟古道中

尉氏有阮村卽  
南北阮舊居也

綠楊深處憩壺觴社鼓迎神亦自忙留得上元燈火在盲

詞聽說蔡中郎

元瑜書記意如何舊宅淒涼策馬過欲問建安埋骨地春

風原上草無多

睢州城外暮雲黃更出城來十里長兀兀騾輿行不得夕

陽人影駱駝岡

讀罷殘碑立路歧  
睢陽廟口忽沾衣  
魂歸不見神鴉到  
落日荒荒雀亂飛

土銼繩牀不耐眠  
空亭一帶少人烟  
松醪賦裏尋殘墨  
記

得風流七百年

睢州有寶墨亭相傳東坡書松醪賦處

夕陽古道少人行  
數過郵亭第幾程  
料理一鞭殘醉裏  
曉風時節到蒙城

寥落人烟繞郭同  
河流活活十年中  
水田一片閒鷗影  
誰

向南湖問晏公

南湖在歸德城南宋晏同叔放馴鷺于湖中卽其處也

郭門楊柳不勝鴉  
何苦東風作意斜  
惆悵百花生日日一

壺濁酒在天涯

郭外

騎馬意遲遲春衣草幾絲鴉啼金柳驛兔走木蘭祠山色  
猶前代河聲異昔時高家三十五何處更吟詩

醉後城上晚眺作長句

出門大笑黃河聲酒酣獨上睢陽城城頭莽莽一回首落  
日正照長橋橫風沙卷空鳥側目中有萬里秋蓬驚心如  
遊絲不肯住飄瞥忽與孤雲征昨從江上擊楫行意氣一  
往凌長鯨胸中何止有雲夢眼底竟欲無蓬瀛到來埜色  
平似掌抗手不見青山迎棱棱五岳方寸起奪彼與此天  
無情西陂之側陂水清東臯亭下烟雲輕百年第宅已如  
許草澤豈得長留名詩壇寥寥高李唱舊苑寂寂鄒枚盟

千秋塵土喚不起高調一曲悲風生

同人約看海棠不果往枚菴用放翁集中海棠詩韻

索和

春來畫徧旗亭壁減卻吳兒腸木石一夜輕塵破軟紅海  
棠借得東風力多君攜酒蹋青疇約我看花過紫陌展齒  
纔乾細雨痕帶腰未斷芳塵跡高燒銀燭知何地小繫金  
鈴憐此日卽看霧眼漸茫茫若話風情應歷歷獨我愁春  
春未知少陵只合不題詩落紅明日真如海喚起花魂再  
上枝

汎舟東郭外

斷雲東去有茅菴郭外尋春路未諳不信綠波流得到一

聲柔櫓似江南

夕照人家半掩扉閒尋舊苑獨沾衣當時詞客今誰在一路楊花作雪飛

采桑詞

朝采桑采桑城南陌多露行來古牆側牆高出手風更狂  
妾身苦短桑苦長桑苦長忍蠶餓日日提筐桑下過無人  
知有靈輒臥

莫采桑采桑城北隅東家西家來往俱門前女桑采須緩  
妾身苦長桑苦短桑苦短愁蠶飢一蠶得食四海衣可憐  
不若桑蟲肥

半月舫小憩

登樓苦憶舊星辰月地分明寄此身名士齒牙原有慧美人  
爪甲更無塵欲尋艷錦焚餘色誰識孤琴爨後因茶味  
悟仙香悟佛笑他花影自橫陳

風前

風前誰弄玉參差吹起離愁入鬢絲花好不禁魂斷後月  
殘常是魄圓時一年刼墮紅塵海十日寒生翠被池可惜  
梁臺數株柳無人與唱冶春詞

不雨歎

我家生長湖之隈年年苦雨愁黃梅籜龍鞭尾走溪上閒  
圍一片生莓苔門前便是繫船處船窗恰並柴扉開有時  
賞花就移酌湖上飛出鷓鴣杯宋中雨月墮塵夢土塊不



破馳輕埃畢離礎潤百不驗祇有荒銼生烟煤江湖作用  
豈在大一滴便使陽春回雨師何事絕飄灑客窗兀坐心  
如灰我聞此地經水患十年第宅成蒿萊天公仁愛有過  
舉今日補救良非灾不然昆吾瓦已盡闕伯亦已留空臺  
千年豈有劫餘火赤雲炙日重徘徊但祈膏雨澤下尺麥  
田一夜抽根芟化工無私物自物南北氣候吾何猜微誠  
欲上苦不達閭闔蕩蕩高崔巍空中擲筆阿香笑車聲四  
野轟如雷

初夏雜詩和王秋塍明府韻

春遊縱盡牧之狂一榻閑消午夢長花事漸闌絃索歇怪  
來客思冷如簀

瘦骨風前爾許孱  
忽攜吟卷照塵顏  
風流得似王猷少  
官舍蕭蕭竹影閒

紅情掃罷倦凭闌  
睡起還遲日半竿  
幾日春衣都退盡  
木棉花下忍輕寒

坐對爐烟詠四愁  
草堂深處冷於秋  
林鳩催客出門去  
滿地綠陰如水流

聞笠舫學博訃

永齋曾爲故人開  
小約清遊到看梅  
一別豈知長夜隔  
九秋空盼短書來  
魂招鶴市猶能識  
鬼唱鴛原最可哀  
重把君詩和淚寫  
兩行紅燭併成灰

令弟學和匪瞻  
傅爰先已去世

十二硯樓歌爲陳季馴賦

頴川公子有硯癖愛硯過於米顛石搜奇每讀羅文傳博  
古兼收帝鴻籍朝朝寶氣射牛斗乃出君家樓百尺興來  
邀客時一登遍拓窗櫺岸巾幘傳觀古硯一十二配以龍  
賓同拂拭金清玉膩各精妙艷者紅絲淡蕉白形如鵠眼  
空更靈紋比牛毛細尤仄或因方矩雪作池亦有圓規頻  
成璧良工已仿井田制清錄兼標洞天格呼爲石友硯不  
辭一任摩挲共晨夕君言此硯遍天涯曾費輕裝十年積  
是端是歎百不知但具天工都愛惜山靈失喜河伯怪一  
取先愁棄千百卽今什襲貯樓中時有烟雲漏空隙虹月  
從誇江上船鷗波豈羨吳興宅他日從君借石田結鄰擬  
住西陂側

留題少伯讀書處

風雨瀟瀟黯碧除  
燒琴焚硯恨何如  
玉樓一事君應慰  
無數人間未讀書  
草草驅歌日夕聞  
客程又向馬頭分  
如何一掬離亭淚  
灑遍斜陽不見君

尚絅堂詩集卷十五終

尚絅堂詩集卷十六

陽湖 劉嗣綰 醇甫

燕囊集 壬子

觸暑北行襪被千里東華塵土得毋西山笑人

征途曉發

郵亭如故人十里一相送昏昏別時酒復此風中中揮鞭  
出梁臺身落塵土空驛鐙到曉孤城角先秋動松梢挂河  
漢清露滴衣縫忽信馬蹄遙村村踏殘夢

比干墓

麥秀殷墟在苔文汲冢穿剖心何歲月埋骨此山川金闕  
寒雲廢銅盤古月圓棠梨花上血辛苦是啼鵲

途次漫興簡陳理堂

鞭絲草草上長安塵土如山正浩漫都下定傳王式至市中誰作馬周看十年懷刺空餘傲五月披裘不耐寒野店相逢各惆悵鄉心一夜渡桑乾破帽殘衫不自聊當年詞賦憶題橋名場易改新花樣客路空攜舊柳條慘綠重來魂黯黯紅一墮夢迢迢郵亭且覓膏騰醉便當江村抵足宵

渡河

寒鴉晚趁人小坐危檣側一帆風日轉吹上江南色春郊不隱髮鄉樹渺已隔迢迢理衣帶落落听巾幘古木橫渡頭乘槎倘來客

欲雨

垂垂一林棗下有小兒女莫雨村上來雙鳩蹋枝語

自在平至平原道中雜詩

野店荒鷄唱未終起聽殘角戍西東鈴聲歷歷出門去一路馬蹄殘月中

荒荒曙色上寒烟河影還低一角天唱遍曉風楊柳畔無人知有柳屯田

葉葉涼雲淡淡流此間可許纜輕舟蓮衣褪盡冷於水十里野塘風色秋

歇馬涼棚浣酒瓢不成村落不成橋夜來幾許還鄉夢遶遍黃河帶一條



維摩天女倦思量  
何況閑愁在異鄉  
暮雨不來山悄悄  
誤人殘夢到高唐

裊斷清詞隔畫樓  
夕陽影裏小勾留  
秋來草沒綿駒里  
一片蟲聲絮客愁

朝朝借得日邊槎  
今夜須過織女家  
一到明河回首望  
美人無數怨匏瓜

三條紅燭四條絃  
舊夢無端到酒邊  
懊惱丁娘歌十索  
風懷渾不似當年

抵都後簡旭岡

雞栖作隊一車來  
立馬同登郭隗臺  
客裏嘯歌原跌宕  
人前顏色漫低徊  
外家梨栗尋常憶  
內苑櫻桃次第開  
三市

燈聲六街火芳尊不用管絃催

投壺

投壺釋禮篇如射集衆耦文通魯薛鼓欵別周秦占籤新  
標甲乙尊古設丁丑因開文史場用召雅譔友晷然窗洞  
八豁若衢達九五磚應許量十石安用狃龍文扛有餘雁  
足舉不苟提如執牛耳扼似塞虎口瓶誇膽堪容鼎笑腹  
能受中虛更上缺小擊還大扣方圓位天地凹凸象谷阜  
兩旁珥誰爭四角盤豈偶群公較技精賤子奪標久小試  
到猿臂餘文借貍首爭籌報鷄人積算添鶴叟運非軍中  
量畫可地上割四百回驍分五十步豸守立纔一鵠先從  
乃二馬後高擎蔗中臂直貫柳生肘欲撾腰鼓腰故束手

弓手翻然足蹠蹠撇爾身抖擻下下期自上左左恐復右  
或脫若兔起或挺若鹿走或搶若鳩低或落若鶻陡往來  
斐琅玕投報亂瓊玖花枝縱橫交蓮箭斷續有穿楊欲悞  
札破竹恐成帶蟬聯夫如何魚貫尙能否一麾殊僕僕再  
發更某某全神目闕睛餘力身戰拇當頭箭出筈應手杵  
人曰有志許破釜無用請覆瓿角崩同追逃耳貫類獲醜  
終分石雌雄一決銅牝牡登臺爭鷹呼據地各獅吼望猶  
立木雞笑忽蹲玉狗喜撫桓伊箏快擊秦帝缶狂碎處仲  
壺怒撞亞父斗雖無肉陵肉願竭酒池酒一笑天爲開玉  
女閃窗牖

寄楊荔裳先生西藏

千峰劍外鬱嵯峨破陣新翻出塞歌聽說功成收汗馬欣  
傳書到寄明駝一年土谷平蠻頌六月天山殺賊戈自是

王師本無敵書生容易受恩多

萬里西行匹馬還才名早合動塵寰過秦論在應傳世論

蜀文成竟入關兩代官聲叩竹地

令伯笠湖夫子知邛州  
時適扁兩金川告捷

一家戰績賀蘭山

蓉裳師尹伏羌值回匪  
不靜以守城功得擢

盾頭磨墨尋常

事誇向同朝橐筆班

### 晚過龍泉寺

野綠一花秀寺門殘照前立當秋蟀地吟到晚蜂天清影  
墮蘭若孤懷生竹烟石牀隨意掃來抱碧雲眠

### 何子西憶梅圖

風雨兼旬掩關坐一卷離騷忍朝餓何郎索句欸門來尺  
幅家山眼前墮家山遠在天之涯披圖卻對夫君家東西  
簾額卷天際四山香雪飄梅花銅井南頭接元墓策杖尋  
梅知幾度海上樓臺姑射居江村竹樹維摩路君言別後  
風光陳憶梅兼憶梅邊人曾觴東閣無多日一夢西湖又  
幾春青衫浪走終何益我亦家山坐相憶溝水無情只自  
流隴頭那得閑消息吟社年時傍二泉將船載酒玉壺天  
零星鐘磬來塵外片段烟雲到枕邊山窗風日正清美口  
嚼紅冰嚙春水爾時肺腑盡高寒會向東皇訴真宰一闋  
梅花一首詩溪堂橫笛最相思黃昏淺水林逋句人日東  
風杜甫詞別來料得梅常好只恐梅邊人易老翠羽枝頭

隔幾重還疑身落羅浮島回首山中但白雲十年猿鶴漫  
殷勤夜來明月空於水萬樹寒梅正憶君

食蟹戲作

錢生貪說嗜蟹畢子苦愛持螯且沽北郭新釀來伴東坡  
老饕

稻田畝曲復直荻港村斷還連江南幾點漁火曾照愁人  
夜眠

琴心出水初活茶眼翻風正忙相逢公子一笑偏有詩中  
別腸

積甲高並熊耳磨牙銳似虎頭尊前一語絕倒有蟹可無

監州

時屠笏巖  
司馬在座

大蘇腸出芒角小范胸藏甲兵諸公爾雅不熟觴政但請橫行

新霜今夜將降舊雨明朝倘來內黃封汝千戶大白勸人幾盃

九日集陶然亭

槐花滿路蹋荒烟一角孤亭白雁天客况又過重九日人生能得幾年銜盃菊下誰當醉吹笛蘆中我欲眠明日離懷更憊憊霜風都上薊門鞭

移菊

叢菊生東皋秋光粲盈目離披出晚霜疎散帶朝旭移歸置几盎性適自取足豈愁芳氣露况復護簾幙遲暮非所

嫌相期澹無欲中有南山思忘言證幽獨

蒔蘭

秋蘭如美人媚此空谷裏風攏露烟月湘夢墮千里娟娟  
出山來綺思一以洗嗟非同心人惜此芳竟體孤花聊自  
表向背情何已春來根復生卻笑閒桃李

種竹

食竹不厭肥種竹不厭瘦抱此一寸心何妨節疎漏堦前  
三兩竿尺土亦自茂雖無凌雲勢聊取拂窗牖時時上寒  
綠映此鬚眉透鶴夢歸未歸儵然憂清晝

秋夜

星月隱虛館忽聽風在林夜長鄉夢短秋淺客鐙深病酒



信州集卷之三  
二  
消清况焚香悟道心那堪堦下葉細細和孤吟

理堂將歸揚州索詩贈行走筆答之

金臺梧葉淒以黃樹頭淅淅飛早霜朔風吹面慘不樂有  
客束裝歸故鄉青山一片無情色半刺懷中漸磨沒朝來  
訪我作卧遊冷巷閑門忽相值門前馬蹄行不止與君共  
入長安市長安市上多酒徒一時拍手向我呼花駝駝來  
酒百壺蚩蚩走勸猩猩沽脫衣醉覓屠狗宿蹋月街心影  
相逐誰家教曲出牆來振觸東山舊絲竹弇山使者今原  
嘗年年宴客開華堂我時與君不相遇曾向堂前見君句  
銅盤四壁銜燭龍酒鱗映出桃花紅清謁裊斷碧雲際明  
珠一串驚玲瓏周郎陸弟各年少玉樹森森坐相照翻身

會作鴈鵠舞脫口都成鳳凰叫爾時狂態春風顛春風送  
人殊可憐君除一官冷十年我亦落拓來遊燕只今走馬  
春明路半載紅塵等閒度眼中不識五侯鯖蝦菜扁舟留  
不住送君別君徒愴神我亦夢斷江南春梅花一夜笛中  
落看君獨跨揚州鶴

得季馴發解信作此寄之

蕭寒獨樹掩雙扉門外車聲歷碌歸孤館酒闌紅燭跋遠  
天書到白雲飛驪駒失路無人惜鴈隼逢秋似子稀幾日  
春明行悵望鞭絲催拂洛陽衣

尚絅堂詩集卷十六終

陵只在灤西東花間蝶拍新聲好壁上蛛絲細字工剛是鄰家芳信到綠楊面面有春風

入山雲卷出山舒野服蕭然當遂初有子漸工雛鳳語無

人不乞采鸞書

墨琴夫人工小楷

塵緣到此名應淡結習從他酒

未除周北張南隨地好中央住我定何如

### 高房山山居圖

上山下山得山氣出山入山識山意十年不唱還山吟孤負山人好田地今年寄跡名園間一月隔斷紅塵關朝來潑眼見林壑滿房都是房山山房山詎是山居客晝裏看山與山識密杉稀柳中有人長對白雲岸巾幘雲生雲滅山不知山斷便是雲連時山中人去五百載嵐光樹影猶

參差虛窗蕭寥敞林表西山落翠輕於鳥一絲清氣相往  
來日共爐烟半空裊臥遊雲海興已慵此身那及飛來峰  
房山房山許我從圖中添個山人筇

題畫幅

葯欄誰折殿春枝好似沉香一捻時不枉佳名呼素素東  
風無地著胭脂

薛素素  
牡丹

書格簪花擅玉臺文家女史亦仙才寒山好景無多筆莫

放閑花爛漫開

文端容  
花卉

尙書佳話足風流誰遣幽蘭怨未休一剪橫波看得斷

腸人影在眉樓

顧橫波  
夫人蘭

和萊軒簡叔魯季馴韻

簾波滿院蕩溪光穩放浮生入醉鄉作計已慙鳩並拙呼  
名終笑鴨爭忙客來人海閨中好花到仙源分外香獨立  
小池誰會得楊枝和月唱昏黃

午睡得句

虛室暉生白一方軟紅人在黑甜鄉牆頭花發故可惱屋  
外水流緣底忙渾覺詩情成漫與莫言酒債是尋常兒童  
忽作故山語夢落石泉香更香

小飲汪雲壑先生齋

鄰家小飲借壺觴門外車聲日日忙萬里雲山新畫本滿  
湖烟雨舊詩囊風花過眼前塵在人海驚心午夢長第一  
功名誰賞得牆頭紅杏待平章

題趙子固畫竹卷

唐工畫松宋畫竹畫竹貴直畫松曲誰將曲筆畫竹枝  
畫竹如看竹拜時王孫愛竹與竹肖風骨稜稜寫空照  
竹無怒氣寫不成王孫獨得竹笑聲風林枝枝戛橫玉  
玉龍飛下蒼山足竹來掃地天爲愁凌雲有節爭千秋  
子昂亦有愛竹癖可惜天生仲姬筆若將此畫照鷗波  
滿紙都應竹枝泣吁嗟乎當年此畫列畫禪有董華亭跋  
我詩入畫與畫傳

尙絅堂詩集卷十八

陽湖 劉嗣維 醇甫

寓園集 癸丑

春夏間寓居澄懷園芳塘千頃水木清華一觴一詠  
元圃崑邱如在天上忘其爲人海閒身也

太平鼓

太平鼓三三復五五一人打鼓兩人舞打起東華六街土  
六街門巷聽鑿鑿官商拉雜催花風女兒識得太平字泥  
金小帖懸當中紅羅半臂青絲紐寶釧玲瓏一雙手一聲  
脫手節宛然解得腰間長命纏郎情似紙薄復薄妾意如  
環圓更圓蛇皮絃子三條索絃聲鼓聲相間作郎知妾愛



太平鼓妾爲郎調太平曲聲聲總是太平聲只聽春鶯沸  
滿城願郎譜作丹山鳳簫韶飛入江南夢

代書寄內

十日燕山雪關河及早春書中雙淚暗鏡裏二毛新負米  
無歸路飄蓬不定身何言慰餐飯炊斷到家人  
慣作還鄉夢鐙花一笑看尙煩商去住何暇說悲歡馬齒  
慚余長牛衣累汝單嬌兒應解事莫遣憶長安

得女弟韞如見寄詩因答

宵來鄉淚託方諸記別親闈兩載餘一樣尋君春草夢幾  
回誤我大雷書雪中嬌女珠相似袖裏新詩錦不如慚愧  
阿兄遊興倦唾壺意氣漸消除

來詩有羞彈門下馮生劍  
莫碎牀頭處仲壺之句

春日出澄懷園有作

柳影帶春流門前卽御溝  
白生虛室淡綠到畫屏  
幽抱石成癡坐看雲當遠遊  
此間名海子天上接瀛洲  
院靜如僧寺風鈴自一檐  
花光生暗几樹影落虛簾  
畫借山圖補書從井史添  
香南無個事日計課華嚴  
曲檻無重數都成亞字橫  
紅鱗新水色翠羽故園聲  
小度風花劫閑留竹石名  
遶堤幫一道明日是清明  
此地如金谷東風蠟一堆  
主曾隨竹換客又看桃來別打  
歌鶯譜誰拈畫蝶灰只消紅幾樹  
烘出好亭臺風引蓬萊到壺中  
個個仙花成三月海酒是五湖天  
俗子都迴駕何人許拍肩更偷閑  
半日去作海棠顛

雨窗雜詩

草色和烟綠一庭鄰牆終日響銀瓶開來手瀹清泉出注  
龍茶經注水經  
花枝匝匝遶迴廊更出花陰是短牆東塢夕陽西塢雨那  
容人世不炎涼  
十畝平泉五畝池山邱猶有夢餘思劫灰爨下都飛盡何  
處雕闌是舊時  
紅泥天半幾高樓畫裏江南憶舊遊無數綠楊垂水際一  
時風起替儂愁  
春江如酒酒如淮翠館紅亭一路佳辜負湖山好時節何  
年歸辦蹋青鞋

上巳日獨遊有感

春城吹遍賣餠簫只我吟悰許寂寥何處柳從門上插一  
年花在路旁飄麗人漫說初三日勝地堪誇第五橋可要  
臨流補圖畫永和天氣是今朝

出溪路

門外綠成路沿溪日幾巡沙鷗眠晚照野鶴蹋殘春活水  
無窮趣行雲不住身老漁休笑客同是五湖人

水亭遠眺

湖光十里畫屏工人在縈青繚白中新竹半連僧舍綠好  
花都近御溝紅此間車馬如流水任是漁樵亦便風莫信  
蓬壺天樣遠樓臺指點五雲東

宴荷亭

荷風十畝葉田田占得行窩又一年歌斷不知珠滿路醉  
來惟有酒搖天暝愁墮水紅無那秋夢如雲碧可憐手拓  
紗櫺容小隱水精枕簟好遊仙

哭旭岡

鋤蘭蘭竟摧伐桂桂竟焚天乎一何酷埋此玉樹身君來  
未匝月君病纔及旬豈知當訣絕君命乃不辰大莫不復  
曉人間成短春傷哉古巷中冷落冠蓋塵

君數日前得詩  
中有冠蓋去如

雲落花嶺  
古巷之句

去歲我入燕君方迫南走君言非遠別別我飲我酒酒酣  
出肝腑一一爲我剖示我告別詩心爽不厭口袖詩許君

和墨藩乾未久忍淚一吞聲瑤琨已盈手

南雲何慘淡其下君做廬君有衰年親有弟有妹俱有祖母在堂白頭八十餘全家哭聲咽不敢達起居昨夜招君魂魂來若升墟君兮如有知歸傍晨昏趨

六月霜風號白楊嘯泉裏空階一陌錢灰濕飛不起君昨入我夢別我欲歸里謂君是生別夢覺君乃死呼君君不聞君死長已矣迢迢哭送君嗚咽黃河水

拙修相國得請致仕將歸里門賦呈恭送

家風真果業韋平

節義書傳唐真果身家今是漢韋平御賜句

天語親題海

內驚兩代絲綸真宰相

三朝絹素舊清卿防河策在留

章奏祀嶽圖開注姓名當日先憂今獨樂古來曾見幾耆

英

朝來遵渚詠鴻飛一片南雲傍紫薇鄉里得歸真畫錦  
闕廷難忘爲宵衣傳家笏有三公在祖道筵如二傅稀  
此去吳門閭闔近年年綠野夢黃扉

偶詠

旌旌居要路簪筆署清門事並焚椒誤寃同載苴論欽鵠  
非我族精衛是誰魂衆口陽秋在冰霜不易溫

題雲壑先生滇中草

使者非金馬奚囊萬里還畫圖蒙段外詩格宋唐間興到  
應題柱藏來未買山弓衣爭櫛處傳唱定諸蠻

琴絃詞

郎作膝上琴妾作琴上絃絃絃郎手繫爲妾儘纏綿  
郎作琴上絃妾作絃上聲聲聲郎棄置教妾不分明

太息

太息復太息當階鳴促織欲製新衣裳其如古刀尺

得陳理堂書卻寄

天邊清淚滿方諸爲有蕉心卷未舒好月二分今夜夢明  
星一水隔年書聞雞便舞君應笑騎鶴能歸我不如忽憶  
江南起惆悵新涼立盡碧雲除

絕句

半是陶情半是禪京華小隱只隨緣一鐙秋夢關門住又  
上江湖聽雨船



見殘荷

閒向鷗邊立暮寒秋心都在舊闌干亭亭萬柄青荷葉幾日西風背面看

秋夜病起遣懷

閒身消得病風光六扇油窗七尺牀好日短於磨膽墨清宵長過篆餘香屏山夢拓金鵝嬾井水愁牽玉虎忙多事蒼苔新襪印又隨烟月到東牆

空庭容易晚涼成如葉青衫太瘦生病起風光思竹杖秋來況味問桃笙得分才艷原非福爲占清狂便當名只索閒窗焚筆硯日來妙理坐枯枰

尚絅堂詩集卷十八終

尚絅堂詩集卷十九

陽湖 劉嗣綰 醇甫

離下集 癸丑

寄人離下肯賢所嗟然黃花爛漫一尊陶然秋士在  
焉可以永日

答香竹用原韻

湖海心情倦不支一銍蛩語夜闌時  
鱸香莼菜思家興菱角鷄頭感舊詩  
秋夢原如春夢短朝雲只笑暮雲遲  
世情濃淡商量遍醉倒東籬莫更辭

藍菊

秋菊如秋蘭天然國香佩又如殿春花當王者乃貴藍菊

本非菊誰隸菊部內竊此黃金名粲目競雕績闌邊供鬪  
草陌上付挑菜雖充葯君臣僅數花姊妹如青更儷白苦  
學兒文態烟來鬢常濕雨過面亦醺不辭效顰醜甯免冶  
容誨辟如倚門姬強作滿頭戴呼之菊婢宜胡乃奪菊愛  
夫人纔許學新婦擅敢配竟充東籬陳交列北堂背倚他  
翠袖籠入我白衣隊成藍徒自誇惡紫復誰逮一笑陶公  
籬南山見天繪

友人以海棠果屬詠余愛其名之雅而前人無詠及

者爲賦四律

香霏小閣記前身豈寇胎含別樣春曾是攀條有西府未  
妨摘果向東鄰銜來黃鵠應憐汝飼到青鸞最悞人欲把

三生同證取海棠祠下拜花神

盼到圓期的的遲筠籃烟雨誤垂絲却看酒艷生肌處無

奈茶清入骨時點茶可香國可容人獨倚小巢留與鳥相思

如何喚醒楊妃睡一笑紅塵是荔枝

香事闌珊滿錦城擬招杜甫續詩盟高燒銀燭空前夜小

繫金鈴又一生記曲肯輸紅豆好等芳終恨綠陰成秋來

不那文園渴領畧酸鹹別解醒

紅雲劫後又飛還出手青青幾度攀生小愛看銀杏樹高

寒愁對木瓜山分來蜀雨三春艷點上燕霜一夜斑補入

羣芳名字好綠章重與奏仙班

秋懷詩

疎星耿檐際草露蟲唧唧坐覺寸心驚商聲起終夕病退  
帶逾緩愁來髮同積遣懷借文史歲月已成昔遙夜不可  
晨孤燈影虛壁

秋老風怒號草木意氣粗健鵲翻空來忼慷向我呼雄心  
未肯減所歎歲易徂積賤成久基取榮無近塗逐世非不  
便所失乃故吾有虎射亦得借問南山徒

把卷不忍放時復就枕眠夢中見羲皇往往手一編聰明  
貴深造茲事非任天萬念俱退聽所志獨向前策古入修  
途急行無緩鞭不見大聖人矻矻猶窮年

晴雲卷高空點翳不敢浮一氣見溟滓曠然天宇秋當窗  
抱書坐風竹何修修下有曲池水映我襟帶流鬚眉在空

綠片影涼於鷗同舍入門笑清絕誰能留

塵琴挂虛壁渺然結古歡清風拂拂來勝似十指彈堦前一散步秋氣日夕寒幽蘭漸憔悴隕此庭綠團所保根不移鬱作終古盤餘芳倘堪擷無使騷人歎

獨飲忽成痛浩然生酒悲披衣出庭隅仰視星四垂寥寥雁聲起喔喔雞唱隨夜引愁人繁秋迫志士危龍劍匣中吼此心知者誰

西風戰檐鐵萬馬霜前鳴方寸集百端根觸成心兵世慮苦汲汲時名悼營營中懷竦孤往外物持交撓身心自相離併作萬古爭疎放非所託卽此傲邁征

策策庭前槐蕭蕭井邊桐飄零不自主亂葉隨寒空榮落

期有定胡爲怨霜風昔日巢春禽今時翳秋虫鳥適一天觀化無殊功持此悟至理今古焉能窮

鬪蟋蟀同香竹聯句

金風肅高秋厲氣及蟲蟄雄心一小試欲制不能忍秋聲昔有經此術迄未泯壇登各投主關設亦置尹先將輕重諸次用強弱準身長選僇疾性驚別孤耿一一歸樊籠兩兩隔畦町始如抵觸藩旋類馬脫絢翅張疎梅瓣冠聳半月頂英風露頭角勁氣達項領堂堂犇戰雄罕罕齒兵冷指揮橫短草駢策助長綆居然娘子軍遣將各用牝方其轉戰時機力鬪靈敏飛從壁上來好暇復以整添毫頰初動傳翼身忽逞死生判兩雄性命輕一忿交爭角蠻觸堅

守持鵠屨虎僵鬚，倔強犬錯牙。半繫彼志奪，不可此首屈。  
未肯欹側腰，半折頰頰脰。雙挺三周奪，危險再接出。窮窘  
翻身偶交綬，迎面復脫顙。捺奇策後殿，蓄銳續前猛。合離  
拘衆怒，擒縱激孤憤。突當螳臂却，連躍蝨股並。一跌不終  
仆，屢挫仍欲騁。寧懷碎首想，耻作叩頭請。賈餘靡然從，借  
一憊矣甚。踊躍各三百，成敗決俄頃。據地獅尙怒，走險鹿  
可憫。倉皇轉丸蜺，瑟縮蟄垤蚓。負恐伏鹽腦，勝比歸受脰。  
凱旋莎亭歌，兒戲棘門哂。吳軍墨未退，漢幟赤已併。榮茲  
蟻歸國，醜彼蛙在井。壯哉蟲達功，封可萬戶等。古來宇宙  
事得失，論難允螟蛉與二豪達者，請借警。

觀尋橦戲作



輕於梭擲疾於丸傀儡場中百尺竿拚着一身遊戲在朝  
朝顛倒與人看

衆上相逢馬上推郭郎舞袖小裴裒諸公只解從旁笑可  
會竿頭立脚來

失履

隻履飄然去孤蹤笑此身西來空有佛東賜到何人漫想  
行殘雪曾經蹋輓塵明朝蠟雙屐浪走悔踈踈

送陳季馴還章江官舍倒押香竹詩韻

霜風灑灑生酒鱗華堂絲竹嬌青春尊前忽起折楊柳送  
君遠去章江濱感君意氣握君手爲有盟言指星斗夜來  
紅燭大於椽照我吟成霞滿口前年識君楚水寒梅花官

閣日未殘一尊移對梁苑雪側帽東風同倚闌天涯策馬  
坐相迫千里金臺衰草白一年兩度見君來我是主人君  
是客片雲日夜飛上頭聽說人愁我亦愁打窗落葉颯如  
雨出吻便似蟲號秋鴈哀當風興不去十日爐邊等閒度  
別君又苦太匆匆何日江天嘯傲同江天寥寥舊相識社  
憶張南更周北當時仙侶盡同舟咫尺方壺渺難卽長江  
寒影搖玻璃客夢明朝下虎溪勸君且盡杯中綠門外驅  
駒未終曲

城南晚望

立馬城南路誰知獨客心林光寒夕照雲氣莽秋陰長笛  
晚逾響斷碑閒更尋尙餘懷古意雉堞一登臨

過張船山

海天誰賞伯牙音  
世味從君辨淺深  
結習盡除名士氣  
論交須見古人心  
友爭索稿思焚硯  
僮亦知書勝典琴  
却笑張顛顛不了  
朝朝醉墨滿衣襟

爲朱少仙題畫幅

梧宮樹樹起秋聲  
隔着銀牀坐月明  
夜半忽聽仙鶴語  
碧天吹下董雙成  
雪水冰桃洗艷詞  
寒窗有客悔情癡  
開圖值得拈花笑  
已是阿難證道時

寒夜秦端厓先生齋中宴菊

秋光猶戀傲霜枝  
芳酌沉沉不厭遲  
陶令門風屏上畫  
謝

家山色袖中詩出示晚宦情似墨磨將盡客思如簫冷自知忽漫論交悲大阮  
江遊草謂古三叔氏竹林身世太參差

唐花詞

花房消息報紅紅  
壓倒唐昌舊譜工  
種玉田多橫畝畝  
藏花塢小拓弓弓  
驚笙炙借三分火  
羯鼓催成一串風  
青帝朝來替粧束  
金鈴懸出畫堂東

金谷薪然蠟作堆  
冬烘似此亦天才  
三生骨剪紅霞出  
九轉胎還絳雪來  
妙手願充修月戶  
全身合築避風臺  
不須更借司春力  
天上璫花頃刻開

裁紅疊碧倩紗籠  
障底仙雲十步逢  
一國儘容韓虢住  
雙房都爲尹邢封  
東風鈴索隨高下  
北地燕支入淡濃  
留與

詞人開燕九闕鐙院落看重重

豐臺兩載寄吟窩樂府空翻緩緩歌隔座霧成三里遠入  
簾風借廿番多折梅消息憑荒驛種樹生涯問橐駝一點  
紅鐙數株雪自扶殘醉自婆娑

王秋塍入都過晤

下馬雪花大相逢一笑看關河如短夢燈火更長安冷癖  
空耽句高情不耐官鴛鴦湖上路老屋漸蕭寒

丁辛老屋

奚鐵生寫天寒有鶴守梅花卷爲李筠谷賦

十年夢落西湖上乞取孤山作屏障慣騎仙鶴下山來看  
到梅花自開放飄然一度春明春披圖忽見梅主人圖中  
主人我近識乃是孤山山下客孤山之孤一老逋孤山得

君山不孤君言孤山孤絕處一樹梅妻一鶴雛我疑梅鶴  
君化身梅耶鶴耶君弗嗔君還笑我風格似恨不孤山同  
結鄰願君留客不啓關呼梅伴客梅滿山願君放鶴不出  
山呼鶴守梅鶴卽還君於鶴梅知有舊君出山來寒更透  
梅花縱使銕石腸鶴骨如君倘清瘦多君憶鶴兼憶梅我  
亦故園梅正開梅花飄飄作胡蝶野鶴幾時歸去來歸來  
重踐山中諾如君圖中歸亦足因風寄聲梅與鶴誰其云  
者兩黃鵠

寒窗絕句

紙窗常似白雲封坐撥爐灰寸寸紅留得茶聲終日聽居  
然枕上有松風

尚絅堂詩集卷十九終